

德壯果公年譜

德壯果公年譜卷二十六

次孫花沙納恭纂

嘉慶八年癸亥

八月初九日

公抵熱河

行在請

安卽蒙

召見渥荷

恩獎再四

褒勞並

諭以苗疆平定旋辦教匪卿馳驅三省暴露於外幾及九年向以軍事方殷眷念勞臣無由接見今詰戎歲績六合澄清卿功比褒鄂名滿天下而朕尙未識其人因

命移跪軍機大臣墊近

御前

上審視之泣下公亦泣下是日奉

旨賞給馬匹

命在紫禁城騎馬並

御製詩賜之

恭錄

御製詩

賜內大臣成都將軍繼勇侯德楞泰

廟謨夙領久超羣  
屢典戎行勇略聞  
功著川中安萬姓  
名揚閩外冠三軍  
褒封特建千秋業  
受澤毋忘百戰勳  
福將來朝諸事定  
敕甯遵路息紛紜

初十日

賜哈薩克越南使臣宴於萬樹園公與焉

十三日

諭曰本日召見德楞泰詢及從前殲斃齊王氏姚之富情形據稱齊王氏等由陝西向東奔竄明亮德楞泰帶兵追剿賊匪由上

津堡竄至張家灣溝內彼時賊匪如從溝口竄出大路卽毫無  
攔阻因別無路徑可以繞至賊前正在焦急忽見賊衆轉回又  
有數千人緊跟其後疑係另股賊匪及詳加察看並令官兵示  
以軍中暗號始知係屬鄖西鄉勇迎頭將溝口截住賊匪因前  
有鄉勇迎截思欲搶上山梁經呵哈保帶兵下壓明亮德楞泰  
督率弁兵四面圍剿齊王氏姚之富等無路奔逃遂跳巖跌斃  
其時因急欲奏報未及詳查僅將帶領鄉勇出力之外委保奏  
當蒙恩越級陞用守備後來方知此項鄉勇實係鄖西縣知縣  
孔繼楨平日自行捐貲雇募練習有方彼時全資其力德楞泰  
因當時未經保奏後來事隔多時亦不敢專摺具請但際此大

功告歲凡軍營出力人員無不仰邀恩獎而孔繼櫟從前著有勞績實不敢掩沒其功等語孔繼櫟平日官聲本好朕所素知現又據德楞泰保奏伊前此殲斃齊王氏姚之富等實屬該縣所募鄉勇認真出力自應查明酌加優獎著傳諭吳熊光詳查該縣令從前所帶鄉勇是否自行出賃雇募孔繼櫟現在有何加銜是否賞戴翎枝據實具奏候朕加恩

九月初三日

諭曰現在三省軍務全蕺德楞泰係成都將軍不必兼參贊大臣銜

是時陝省南山零匪煽動偷渡漢江由西鄉入川奉

御用身公公訓卷二十一  
旨德楞泰係成都將軍著卽行赴川督剿代額爾登保還京

初九日公

陛辭起程回成都將軍任

諭曰德楞泰現於初九日起程回任已諭令於過陝時前赴南山計彼時零匪自己辦淨儻德楞泰到後尙有未完餘孽額爾登保不必急於起程竟當在彼多住旬日會同督辦務須搜剿無遺方可來京瞻覲方維甸近在省城一得探報信息卽隨時馳奏以慰廑注

二十日

諭曰德楞泰自京回任時已諭令路經陝省卽前赴南山將所餘

零匪督率趕緊辦竣本日據額爾登保奏南山零匪約有男婦二百餘人且有騾馬已竄至鎮安米糧寺由茅坪羅家峽東竄並聞竄至江口地方有焚燬兵房之事南山零匪前祇數十人今又聽其裹脅至二百餘人且帶有騾馬沿途焚掠已竄至鎮安地界看來自奏報肅清後帶兵大員及將領等均不免鬆勁已降旨申飭令額爾登保速赴鎮安督剿並將楊遇春拔去花翎將楊芳吳廷剛革去翎頂令其戴罪自效計德楞泰此時已將抵陝省著卽馳赴鎮安會同剿辦德楞泰行至陝境遇有裁撤兵勇擇其得力者卽酌量帶回幫同剿賊此內鄉勇一項尤應留意該勇等本無恆業惟利是趨恐裁撤後無業可歸一聞



殘匪聚集又復前往助惡不如乘便帶往統俟將此股賊匪二百餘人剿淨後再行裁撤方爲妥善此時額爾登保已挑派勁兵遏賊東竄之路並親帶官兵由白土關興安取道前進再得德楞泰前往會剿自當就地一鼓殄除不但不可令其竄入豫境亦斷不可令其再逸入二竹又延時日總期一兩旬內迅速全行辦淨此爲至要

又

諭曰前據德楞泰奏稱伊從前殲斃齊王氏姚之富等實由鄖西縣所募鄉勇認真出力會降旨令吳熊光查明具奏茲據奏稱其時鄉勇係縣民郭友桂榮爲首經該縣孔繼樞曉諭自相圍

練等語該縣孔繼楨練集義勇素爲得力前次齊王氏姚之富等竄至該縣得以隨時就擒實屬能事現已大功全藏自宜加之優獎孔繼楨著加恩賞加同知銜並賞換花翎義勇桂榮著加恩以千總卽用其郭友據稱不願入營著加恩賞給千總銜用昭獎勵

十月初五日

公偕方維甸奏言

臣

德楞泰於二十六日臨潼途次接到

臣

方維甸來信並甯陝鎮安文武稟報賊匪由鎮安洵陽

竄至鄖西界上經楊芳帶兵截回與楊遇春分路兜剿參將特依順保等從東北面堵截經略額爾登保亦自安康

漢陰前來督剿賊匪聞知大兵全集連夜折竄西南於九月二十日在石泉之七星壩地方躡淺渡過漢江南岸竄至西鄉之白沔峽茶鎮等情伏思南山內山深路險秦嶺太白山一帶老林叢密處處有藏身之地搜捕每難得手今此起零匪被官兵追截業已逼出南山兵力可以施展轉不致久稽時日是此次賊匪渡江實係極好機會臣德楞泰查賊竄之白沔峽茶鎮地方皆係由西鄉入川之路賊匪於二十日渡江邇日必已入川且聞賊匪多係川省之人或竟奔回太平大甯等處山內潛行解散亦未可定卽或尙在竄擾該處本有勒保督同提督豐紳總兵田朝

貴馬瑜等數路官兵

臣

德楞泰親往勦辦亦屬易於撲滅

計自西安至賊匪渡江處所約有一千數百里

臣

德楞泰

於拜摺後卽由棧道馳驛前往漢中從西鄉一路追勦

臣

方維甸已飛飭陝安道朱勳等雇備騾頭撥給馬匹送至

川境以期行走迅速所有

臣

方維甸預備隨入南山之軍

標撫標兵五百名俱已停止前派防堵峪口官兵亦卽撤

回本營

臣

德楞泰伏思三省賊匪全平所贖者祇此湊聚

之二百餘人川省本有兵勇足敷調遣無庸楊遇春楊芳

等越境帶兵追勦且南山地方深廣必須分路排搜陝境

甫就敕甯亦須有兵彈壓

臣

德楞泰到軍營後卽令楊遇

春等率領原帶征兵仍回南山分路搜捕以本省提鎮帶兵辦理可期得力至額爾登保前奉

諭旨令於

臣

德楞泰到後更替回京嗣因南山零匪湊聚增多仍

留額爾登保在南山督剿今此起零匪業已渡江陝省肅清並無應剿之賊若經略久留在外轉似大功尙未全完愚民無知未免傳聞疑慮應俟

臣

德楞泰會晤額爾登保商定一切額爾登保即可回京恭復

恩命

臣

德楞泰係川省將軍在川督剿固係專責卽或擊散後尙贖數十竄匪無論竄至何省亦卽趕往剿辦不敢區分畛域再南山雖已肅清然林深箐密不免有匪徒乘間擾掠

之事其在老林藏匿之一二零匪亦難保其必無此皆地方官應辦之事自應逐處搜捕務使窮鄉僻壤匪蹤淨盡以冀仰副

聖主綏靖疆圉安輯閭閻至意

諭曰南山餘匪逼過漢江竄入西鄉一帶楊遇春等帶兵躡剿額爾登保亦已過江督辦南山稍覺空虛恐尙有餘匪潛匿是以諭令德楞泰前往巡查今據奏賊竄之白沔峽茶鎮地方均係西鄉入川之路賊匪適日必已入川德楞泰卽由棧道馳往從西鄉一路追剿等語計德楞泰此時已行過西鄉將入川境自不必再行折回前赴南山但三省久報肅清而零匪尙有一二三

百人往來奔竄肆行無忌成何事體現在該匪竄近川省想額爾登保自己忝會勒保飭令官兵迎擊德楞泰馳抵該處務同額爾登保嚴飭帶兵大員奮力兜截將此起零匪儘此月內趕緊辦竣毋再遲延至額爾登保前已諭令暫緩來京大功告蒞後或有餘孽未盡經略大臣在彼多駐數旬務臻完善此尙事理所有儻辦理稍有疎率回京後仍須復行馳往則真駭人觀聽也又稱到軍營後卽令楊遇春楊芳率領原帶征兵仍回南山搜捕自當如此辦理該二員本係陝省提鎮南山是其管轄自應責成搜剿著德楞泰傳諭楊遇春等卽速回陝務當周厯巡查實力搜捕如果無遺孽卽出具印結咨方維甸具奏再當

核其功過

十四日

諭曰額爾登保奏此次殘匪向南奔竄副將朱槐等倉猝被害殊屬萬分不值朱槐向在軍營帶兵尙屬出力今因迎擊賊匪猝被矛傷陣亡自由伊等見零匪無多稍涉大意閱摺內所稱該匪竟與官兵衝突又稱竟敢下壓數次詞句之間多有輕視賊匪語氣看來額爾登保及楊遇春等自馳報肅清以後均未免心存輕忽卽從前該匪等在南山奔竄日久不能辦淨亦未必不由乎此現在該匪等尙有一百七八十人西竄青岡林一帶或尙有著名頭目如苟朝九余佐斌等改易名姓隱匿糾結亦



未可定此股零星湊集殘匪竟至戕害大員及弁兵多名罪大惡極無可憐憫須按名擒斬以絕根株此時楊遇春等跟蹤前進德楞泰諒已到彼額爾登保當會同嚴飭楊遇春及鎮將等趕緊追擊趁該匪等全夥奔竄正可儘我兵力兜截聚殲況吳熊光挑留馬隊官兵一百員名現又到彼額爾登保等軍威益壯務於月內督率辦完毋再遲緩卽此股餘匪已就殲除仍恐尙有一二零匪潛匿山內過冬或來歲春融復出滋擾必須剗除淨盡德楞泰俟此股辦竣後且不必回任當在川陝邊界地方往來偵緝須至來年春間如果一無萌蘖可期日久敕甯彼時德楞泰奏明再行回任亦不爲遲

十六日

公奏言

臣

於十月初六日行抵漢中接准經略額爾登保

來信賊匪過漢江後屢被楊遇春楊芳等截剿額爾登保  
又親帶官兵在西鄉縣屬之觀音堂一帶迎剿殲獲甚多  
現在祇贖賊匪二百餘名或竄四川太平或奔巴山老林  
均未可定等語查該匪等大半皆係四川無業游民湊聚  
山內經官兵搜捕緊急卽渙散竄出山外意欲逃生是以  
沿途行走並不殺害百姓現經額爾登保親督官兵緊追  
而楊遇春楊芳等亦均折回有此各路官兵分投剿辦斷  
不能久延時日

臣

又查湖北境內業已肅清四川所贖零

匪現有提督豐紳總兵田朝貴蒲尙佐副將羅聲皋桂涵等數路官兵搜捕足資辦理是以飛札總兵馬瑜將<sub>臣</sub>原帶兵勇二千餘名帶領由太平取道迎剿此股賊匪前來

<sub>臣</sub>現由西鄉渡江入山並無隨帶官兵今此股賊匪業已

南竄有入川之勢相距穆家壩甚遠<sub>臣</sub>已將汪啟所帶在

南鄭防堵官兵二百名並漢中協標官兵一百名共湊集

三百名帶領前進俟馬瑜帶兵趕到時再令此項官兵各

回防汛現在卽取道西鄉定遠一帶迎晤額爾登保妥籌

計議迅靖餘氛如賊已所贖無幾未便以數十零匪牽綴

經略在外<sub>臣</sub>自當接手辦理完善厥功

諭曰此股遺孽昨據額爾登保奏到連次趕剿已截獲數十名此時祇贖一百七十八人德楞泰發摺時自尙未得信息此股竄匪現由青岡林西竄昨已有旨令德楞泰會同額爾登保督率將領趕緊兜擊務趁全夥奔竄之時悉力辦淨額爾登保德楞泰惟當遵照前旨於月內辦完不可延緩至摺內所稱該匪等大半係四川無業游民零星湊聚經官兵捕急卽思渙散此次出山之後意欲逃生沿途並不殺害百姓等語此則斷不可信該匪等先經燒燬兵房昨復將副將大員戕害並傷及弁兵多名安得謂之意在逃生有心渙散此時官兵爲數不少正當上緊趕捕卽賊已四散亦當悉力窮搜勿遺醜類不可先存招撫

之見希圖解散之事卽該匪見官兵剿急相率乞降亦當密察其實係真情悔罪如張長青王國賢者方可貸其一死切勿墮其奸計以致來春撤兵之後遺孽復萌此爲至要不可姑息至摺內稱與額爾登保會晤後如餘匪無幾伊自當接手辦理等語德楞泰辦理奮勉數年以來各處著名首惡並大股賊匪俱被剿滅何況此零星餘匪豈難剿淨尙須額爾登保在彼與之合辦但伊身係經略自應將各省餘匪辦理淨盡地方甯謐方可凱旋也

二十四日

公偕額爾登保奏言賊匪因我兵追急連夜由青岡坪筆

筒觀任家坪一帶向西奔竄楊遇春督率楊芳吳廷剛跟

蹤追躡

臣

額爾登保親率官兵由荒田觜長嶺一路顧東

而進接據豐紳田朝貴稟報前因接

臣

札飭知有殘匪南

竄恐其遁入川境一面酌留官兵分段搜捕一面均帶兵

探剿前來

臣

隨飛飭豐紳由西面樓子廟一路田朝貴由

雞侯壩一路分投探蹤以收夾擊之效初九日師抵麻池

寺據楊遇春呈報初七日探悉賊在巴山林涼水井老林

分屯當令參將祝廷彪都司劉滿貴守備馬忠良挑帶兵

勇由梧桐坪老林自北向南堵截該匪去路楊遇春楊芳

吳廷剛親率馬步官兵由轉金坪進擊均於五鼓起行次

日午刻行抵賊屯賊匪已邀約同竄楊遇春當飭兵勇分  
路趕殺外委劉剛首先持矛衝入連斃賊匪三人兵勇吶  
喊繼進深入林箐槍箭並施又斃賊匪二十餘人生擒劉  
老么等七名該匪均翻林竄向梧桐坪經參將祝廷彪等  
帶兵截擊又斃賊匪七名生擒徐得升等四名餘匪盡向  
西南逃竄楊遇春一面督兵追躡一面將獲犯耳記解送  
來營臣親加審問劉老么徐得升等供稱我們在山內時  
本祇八九十人是李彪帶領後來零星裹脅六七十人并  
攜背鹽之人四五十名共湊合有二百多人逃竄出山又  
在鄖西地方一路裹擄是以有三百來人被官兵節次趕

殺已將李彪殺死如今是一個姓王的一個姓馬的管事  
不知他的名字衆人稱他們爲總管等供臣查前在山內  
趕剿時卽聞稱此起殘匪係李姓爲首現又據獲犯供詞  
似屬可信當將劉老么等各陳賊一併正法其被擄未及  
一月者卽予釋放茲復探報該匪竄至紅羊河松樹壩一  
帶因聞前路有豐紳帶兵前來卽折由馬家壩老林北竄  
大坪楊遇春已願北抄截臣查大坪逼近江岸尤須先爲  
抄願隨派參將哈豐阿劉建標挑帶奮勇官兵五百名由  
塔壩河水沙坪兼程抄截箭桿山臣率兵由拴馬嶺楊家  
河取道向西北而進十二日行抵司上適臣德楞泰由西



鄉趕來

臣

額爾登保卽於途次跪請

聖安恭聆

聖訓後隨會同一路由杏兒埡羅緘壩一帶向西前進十三日據哈豐阿報稱十二日午刻帶兵趕抵楊泗廟正遇該匪前起十餘人執持長矛竹桿由溝內竄出當經兵勇上前擒捕戮斃賊匪五人生擒二名餘匪六七人飛奔折回後起賊匪知有兵來卽翻山南竄適楊遇春親帶馬隊官兵由箭桿山抄來當卽合兵一路向南跟追等情臣等現已行抵鑽子山顧定北面探報該匪經我兵追躡連夜狂奔菩提河有遁向通江之勢查豐紳田朝貴已均帶兵由川邊

而來前後夾擊實無難迅速掃除臣德楞泰前經札調總

兵馬瑜帶領原兵二千名前來備剿現在豐紳田朝貴已

各帶官兵前來

臣

德楞泰可以就近帶領已飭馬瑜仍在

大甯等處督率搜捕

殊批甚是

毋庸移動再據總兵馬瑜慶溥稟報

由楚竄川零匪經副將馬應國都司史定川帶兵追至金

竹坪詢知該匪假充官兵混過當與楚省帶兵遊擊薛忠

全會同搜緝又據都司瞿心能在沙沱寺獲賊一名又據

田朝貴稟報在白森坪搜獲賊匪九名殲斃九名又派兵

搜緝在鎧蓋窩老林獲賊二名在大寒溪捕獲賊匪一名

殲斃一名在寶峰寺老林搜獲五名又都司龍必達搜獲

一名又守備李思貴獲賊二名又據陝境防剿總兵國興  
阿稟報在沙壩地方盤獲零匪一名均經訊明正法再總  
兵劉瑞稟報遊擊李勝林在界嶺大梁搜獲賊匪苟文清  
一名解經興安府周光裕訊明苟文清實係苟逆堂弟充  
當僞先鋒勦潰潛逃被兵盤獲錄供稟報當經臣飭令凌  
遲處死其餘營卡具報均各甯謐

諭曰現在額爾登保與德楞泰已合兵一處各路大兵雲集軍威  
壯盛更無難剋期掃除但此時賊匪尙在奔逃其獲賊供稱管  
事之王姓馬姓亦未擒獲如此旨到時伊等已剿盡餘匪額爾  
登保即可班師回京或稍有未淨德楞泰係成都將軍交伊督

率將領悉數殄除再本日所奏拏獲賊匪內又有苟文明堂兄苟文清恐各處深山老林尚有漏網賊目潛藏在內卽如苟文明之子苟朝九戕害穆克登布之余佐斌俱未經拏獲此外似此者安保必無其人務當督飭嚴搜俾根株盡絕爲要

十一月初五日

公偕額爾登保奏言竊

臣

等由雙泉子大巴關一路督兵

前進十六日行抵龍池場據楊遇春呈報十五日由九打杵一路探蹤追剿途次見有賊探十餘人當經兵勇上前追捕殲斃七人生擒二名訊據供稱賊夥現匿西代池瓦石坪一帶老林探知川省均有官兵不敢南竄叫我們十

幾人出來探聽何處無兵卽乘間北遁等供楊遇春當將該犯正法取道入林搜剿臣等查瓦石坪西代池一帶係川陝交界處所均係密林深箐積雪尺餘祇有採藥取柴一人行走路徑且地勢最高我兵由何處進剿賊匪皆可憑高望見必須設法轟逼令其南竄方可趕及殲除隨札飭豐紳帶兵由高莊河漩窩一路顧定西北進逼田朝貴帶兵由紅羊河蒿枝壩一路顧東北進剿楊遇春帶兵由上石坂濫池壩進發臣額爾登保親督官兵由倒水洞鞍子溝進發臣德楞泰督同參將特依順保等帶領馬隊官兵在楊泗廟麻柳壩一帶扼截十九日該匪果由老林無

路處所北折

臣

德楞泰先經派有馬隊官兵在大坪一帶

巡哨該匪探悉前有官兵卽折奔分水嶺老林欲思東遁  
適田朝貴一路官兵由蒿枝壩探剿而來正與該匪迎頭  
相遇當經斃賊十餘人生擒四名該匪不敢拒敵卽由大  
水井折竄木馬橋老林屯聚

臣

額爾登保二十二日冒雪

進抵鞍子溝探知賊匪自木馬橋遁向硝洞子屯紮是日  
田朝貴兵至小濠壩楊遇春亦於三更趕到會同五更進  
兵遂令豐紳分兵數百名赴雞公梁設伏截剿又派參將  
哈豐阿劉健標帶兵赴大火地五顆樹分段設伏

臣

額爾

登保親帶副將唐文淑並馬步兵三百餘名於柯水溝口

策應該匪不出大火地定竄雞公梁數路圍攻可期痛殲  
二十三日派令前隊桂涵羅思舉吳廷剛李應元祝廷彪  
爲一路楊遇春田朝貴爲一路自油房溝乾樹梁進兵乘  
雪攻其不備殺賊十餘名生擒四名該匪見我兵雲集果  
向西代池內雞公梁山下伏匿豐紳所派參將馬文斌守  
備張必祿李朝相帶兵於黎明時已抵雞公梁山頂哨見  
溝底有賊卽分兵下壓該匪一面抗拒一面分夥向上偷  
撲官兵悉力抵禦與賊攪殺一處斃賊數名適楊遇春田  
朝貴追兵趕到該匪見前後受敵立形慌亂卽分起於密  
林內捨命奔竄一起竄向鐵廠老林一起竄奔向澗草溝

林內該處盡係密箐我兵分投追趕該匪愈竄愈深遂傳  
令將弁兵勇暫於林邊拏卡圍逼並躡探路徑以防該匪  
竄逸查得澗草溝可通大火地石板河一帶鐵廠可通油  
渣口一帶均係要道臣額爾登保遂駐油渣口豐紳營內  
以防鐵廠之賊因鞍子溝營盤空虛派副將唐文淑參將  
哈豐阿劉健標赴鞍子溝以防澗草溝之賊二十三日黎  
明澗草溝賊匪果從大火地竄出唐文淑等帶兵迎頭剿  
殺立斃賊匪八人生擒二名餘俱敗逃該逆倚傍箐林忽  
隱忽現竄上對面大梁向黑洞溝一帶深山潛竄而鐵廠  
賊匪尚竄伏深林之內現今豐紳帶兵搜剿楊遇春田朝



貴亦已帶兵緊跟前來計連日共斃賊匪三十餘人生擒  
活賊十二名訊據供稱本想逃回四川散夥因怕官兵趕  
及仍商量要覓路北竄等供均經分別凌遲正法訖臣等  
查該匪疊經我兵剿殺所贖不過百餘人臣等與豐紳楊  
遇春所帶官兵不啻數十倍於賊急欲滅此朝食現在弁  
兵鄉勇等深入林箐偵探掩殺提鎮將領徒步入林均不  
稍避艱險乃該匪肆其狡獪往往於林箐內埋伏擊刺連  
日各路弁兵鄉勇間有傷亡實屬可憾若督催過急我兵  
稍有損折實屬不值儻步步持以慎重又恐有稽時日臣  
等受

恩深重三省數十萬賊匪秉承

皇上睿謨指示均已殲除現贖不過百餘殘匪惟有會同設法鼓

勵將弁兵勇於月底月初一鼓蕩平上紓

聖慮斷不敢玩忽遷延亦不敢稍涉大意自干咎戾

諭曰此次額爾登保親督官兵由倒水洞進發德楞泰帶領馬隊  
在楊泗廟麻柳壩一帶扼截節次擒斬賊匪數十名所贖不過  
百餘人並稱月底月初即可一鼓蕩平此旨到時如業已辦竣  
額爾登保自卽遵旨回京務於封篆前趕到爲要至賊數雖屬  
無多但自知罪重無可逃生勢必抵死抗拒爲苟延殘喘之計  
官兵搜剿時於奮勉之中仍須隨時留意若冒險輕進將弁等

設有傷亡固爲萬分不值卽兵丁義勇亦不值以致果敵愾之人與此等亡命之徒拚決死生況現在官兵數十倍於賊以之分撥兜圍使賊匪無食可掠自不難如數殄滅也

十六日

公偕額爾登保奏言前竄上黑洞溝一起賊匪經

臣

額爾

登保派令副將桂涵參將祝廷彪羅思舉帶兵緊躡楊遇春田朝貴帶領後隊接續前進另派參將劉健標等帶兵趕剿鐵廠溝山梁之賊劉健標等遙見零匪向南狂竄追趕二十餘里賊遁入小濠壩大山踞險設伏劉健標等察看地勢萬難得手卽扼住該匪北折之路適楊遇春田朝

貴帶兵與桂涵等接續前進差探黑洞溝之賊已竄出東  
面大山奔向松樹壩折向小濠壩一路兩起賊匪又經竄  
合<sub>臣</sub>等得信後一面飭楊遇春等併力追剿一面令豐紳  
帶兵移駐通江之西壩梁鐵溪河一帶控扼西面防其折  
竄<sub>臣</sub>額爾登保督率副將唐文淑參將哈豐阿劉健標帶  
兵由九打杵馬家壩顧北向東趕剿<sub>臣</sub>德楞泰督率總管  
和隆武遊擊劉廷斌張紹緒帶領馬步官兵趕赴拴馬嶺  
一帶抄截旋據防守麻池寺營卡都司楊輔義稟報二十  
七日晚間賊匪十餘人假充探信官兵竟至卡外經哨兵  
盤詰不能支飾卽動手格鬪當經哨兵持矛戳斃賊匪一

名餘賊上前救護楊輔義帶同外委陶彪出卡衝擊後起賊匪亦陸續趕至竟敢繞出卡後意圖撲壓楊輔義等帶兵分投衝殺刀砍矛戳立斃賊匪五名賊潰亂下奔又滾播石打傷賊匪二名桂涵等旋即趕到下溝衝殺該匪驚竄長嶺山梁時已更餘桂涵卽於對面山包駐紮詰朝仍行趕剿該匪又繞路向南我兵仍緊躡而進二十九日賊匪復竄屯定遠之濫泥埡險山桂涵等以賊匪連日被追必形困乏若乘夜進攻必可得手遂公同商定桂涵與羅思舉祝廷彪爲一路吳廷剛與李應元爲一路均於三鼓帶領兵勇由小寨子攀援而上五更齊抵賊屯吶喊殺入

賊匪立形慌亂當斃賊匪九名生擒六名餘賊退入兩旁  
林箐恃險抵拒內有頭戴翎頂賊目一名較爲兇悍經兵  
丁蘇榮高上前戳斃搶獲頂帽割取耳記餘賊由望鄉臺  
一帶老林潛遁將獲賊解送臣等軍營訊明辦理臣額爾  
登保遂由松樹壩翻鹿池山光棍嶺向東南而進臣德楞  
泰亦由漁渡壩向南進發初二日於白廟堂會合探悉該  
匪被剿後南竄十二灣一帶深林楊遇春田朝貴帶同副  
將桂涵吳廷剛等緊躡而前查該匪雖屬無多往往接仗  
時竟有認識將領姓名各隊旗號者定有隨營夫役遣散  
鄉勇在內每於險要山垵或分路處所留人設伏陰伺追

兵楊遇春田朝貴現在察看地勢詢問道路分兵抄襲以期一鼓蕩掃臣等會同進抵川境太平之黃泥礪接據防堵陝境鎮將劉瑞劉管城興安府知府周光裕等稟報川陝邊界老林有零匪數十竄至安康大木梁又平利之木馬河一帶亦有零匪百餘人由界嶺竄來現在支河一帶游弈總兵王兆夢劉瑞等已分派將領挑帶官兵顧北向南截擊並知會大莊溪喜明營卡一體顧東探截等情臣等查川陝邊界山大林深藏奸本易今安平邊界果有零匪定係各官兵趕散餘孽又復聚集但文武所稟多寡不一是否一股零匪抑係兩股均未聲明陝安鎮總兵王兆

夢前經派令督率照料各營卡尙未據該鎮報到然臣等

既有所聞不得不先事籌顧臣等卽酌令楊遇春先行帶

領官兵由鹿池山抄取捷徑趕赴安平境內查明果有攢

聚賊匪卽當率同各鎮將悉力截剿儻係傳聞之訛該提

督亦無庸復行入川卽於沿途往來督緝以清疆界臣等

仍在川境會剿向十二灣逃竄之賊悉予殲除現在總兵

馬瑜帶兵亦由黃墩渡口場而來更可兩面交擊期於旬

日內外將此股殘匪辦完彼時如陝境有竄入賊匪臣德

楞泰當帶領勝兵赴陝督辦臣額爾登保卽遵

旨北上瞻覲



天顏

諭曰此次零匪約有一百餘人竄出東面大山奔向松樹壩接仗時竟有認識將領姓名各隊旗號者自必係曾充鄉勇夫役之人從前官兵搜剿時伊等或尚在隨營或散遣後尚未從逆官兵自不便擒捕此時該匪等既經竄擾人數至一百餘名且敢假充官兵來卡探信情殊狡惡惟應痛加剿洗勿留遺孽至所稱陝境文武稟報零匪數十人竄至安康大木梁平利之木馬河一帶亦有零匪百餘人在支河一帶游弈額爾登保以既據該鎮等報到不得不先事籌備派令楊遇春帶兵趕赴安平查明果有賊匪卽悉力截剿等語安平境內如實有零匪聚擾楊

遇春已帶兵前往務令遇有賊蹤卽向西南兜逼川省邊界有額爾登保德楞泰等大兵扼截且地面平坦兵力易施不難兜捕斷不可使賊匪向北奔逸設竄入南山輾轉追逐辦理必致棘手額爾登保現駐川境會同剿捕據稱於旬日內外將殘匪辦完今已屆旬日如將殘敗餘匪殲除殆盡當遵前旨起程回京卽所賸無幾著交德楞泰督捕額爾登保亦可入都瞻覲總於封篆前後趕到亦不爲遲仍將於何日起身先行馳奏德楞泰接辦後務須認真搜捕卽此股辦完亦不必急回成都將軍之任尤須於川陝邊境各處深山老林加意窮搜俟來歲春融一無萌蘖實在肅清方可撤兵回任川陝地方山深箐密將來

大兵全撤設有一二未盡餘孽復至煽誘成何事體是在督撫等轉飭文武官員於平日留心稽察先行保甲嚴密巡邏奸宄無從溷跡自不能糾結滋事併當隨時宣諭實力化導俾人人勉爲良善安分守業地方自益臻甯謐矣

二十八日

公偕額爾登保奏言據楊遇春稟報挑帶馬步官兵已於初六日由田壩河翻山取道麻柳壩回陝田朝貴率同各路官兵由田壩董家溝緊跟賊蹤向東南而進臣等亦由廟坡白果壩取道策應初九日田朝貴師次鞍子坪探悉該匪屯紮大窩巖該處有路通柯家坪恐其由此竄出隨

派副將桂涵參將羅思舉李應元帶領兵勇繞道抄出柯家坪設伏田朝貴帶兵由後轟逼該匪果於三更時起竄向柯家坪而來桂涵羅思舉李應元督兵突出迎擊當斃賊八名生擒四名在後賊匪知有官兵卽折由左手黃羊坡老林逃竄時因深夜未能窮追將兵勇在該處暫紮黎明時田朝貴趕到查點巖下跌斃賊匪六名探報該匪連夜由臺子壩向打箭壩逃竄當派守備李朝相帶兵勇十數名跟蹤偵探詎該匪於道旁密林中埋伏突出李朝相身帶矛傷陣亡兵勇傷亡三名田朝貴一面緊追一面將獲犯耳記解驗前來臣等審訊獲犯供稱此股陸續湊合

本是姓李的爲首早被官兵殺了衆人舉出姓馬姓趙姓王三人管事都不知道名字若有人問他就要殺害大家商量總在老林躲避如官兵追來卽乘夜奔跑也無定向等語當將該犯正法兵勇加倍給賞訖復派副將馬應國參將劉健標帶兵勇一千名由白筍坪一帶取道與田朝貴兩路進逼臣等亦由劉家坪涼風埡督率而進十三日田朝貴途次搜獲伏賊四名訊知賊匪屯聚甕坪山頂老林當卽督兵由張果老坪向上仰攻知會副將馬應國等由王家壩遏其北竄之路詎該匪占據山巔哨見官兵卽折由熊坂磴蓼葉坪向西北逃竄十四日臣等行抵柯家

坪探知田朝貴已由明巖灣跟追而來賊匪已竄上廖家

坪大梁密籌該處左可通柏森坪右可通涼風垵臣額爾

登保遂帶領侍衛色克通阿參將哈豐阿等率兵在涼風

垵設伏臣德楞泰帶領副將唐文淑等督兵由半邊街策

應並飛飭副將馬應國等帶兵由三排山取道前進以便

田朝貴追兵轟逼而來數面夾擊一鼓殲除再據陝安鎮

總兵王兆夢稟報該鎮在八仙河營卡巡防因聞平利支

河地方有零匪竄擾當卽會同總兵劉瑞飛飭副將閻俊

烈游擊李勝林都司柯連仲分兵扼剿於鴉河地方殲斃

賊匪三名並拏獲一名訊悉該匪共有四五十人係各路

勦散零匪並會合本處無業棍徒往來掠食由青猴洞竄至支河現被陝界官兵逼勦仍行回川等供當將該犯正法現在賊匪探知處處有兵由高灘河大小垵山折竄深入川境閻俊烈已帶兵追躡入川並飛移川東巡防總兵馬瑜探蹤迎擊又據馬瑜稟報派令都司史定川帶兵在奉節之白馬寨地方探有零匪五名當經殲斃二名擒獲活賊二名又於斑竹園地方殲匪二名生擒二名均審明正法臣等昨據川陝邊界文武稟報忽有零匪竄入陝境核其所報情形似未確切是以先令楊遇春帶兵回陝查辦旋經王兆夢稟報此股零匪四五十人業經督截入川

並詢明人數無多實係一起由安康之青猴洞東竄平利支河並非兩起因地方文武各據差探所報具稟以致歧異現在已入川境陝邊又有楊遇春督率巡緝更可無虞又據楚省巡防鎮將稟報現在亦無零匪各加具印結前來存案是陝楚實已肅清惟餘此百餘賊匪奔竄稽誅等誠恐該匪人數尙多前敵鎮將未經據實稟報連日親督官兵進山查問寨洞居民僉稱賊匪實祇百餘人並未裹脅百姓並於賊匪屯紮處所親臨履勘查點鍋竈數目約計該匪實亦不過此數未經加增實因該匪狡惡萬狀一遇險隘卽設伏暗襲追兵道路稍平又晝夜狂奔不止



我兵分路入林將備均係徒步攀援而林中積雪尺餘異常凝滑以致未能刻日辦竣實深愧憤之至伏查奏報歲功已將一載現距歲除祇一月有餘若蒙古外藩雲集

闕廷

臣

額爾登保猶帶兵在外轉似大功尙未告竣殊礙觀

聽

臣

等想念及此萬分焦急現在會同籌商或隨時指示

機宜或親帶官兵策應所辦一事而臨陣殲擒仍賴各鎮將兵勇之力總當設法鼓勵懸立重賞期於旬日內悉數辦完

臣

額爾登保將陝境事宜稍爲經理卽馳詣

闕廷叩覲

天顏

臣

德楞泰仍駐劄川陝邊界會同豐紳楊遇春等督飭搜緝

侯實在淨盡並無遺孽於明春二三月內再將各本省防兵以次凱撤

諭曰此次額爾登保等督飭田朝貴桂涵等於柯家坪等處節次殲擒零匪二十餘名所贖不過百人其平利地方一起零匪共四五十人經王兆夢等搜剿現已逼竄川境是合計兩起餘匪亦祇有百十餘人無難剋期殄滅額爾登保等自督兵剿辦以來前後各股賊匪數十萬俱以次殲除額爾登保身係經略於大局戡定全功告蒞後即使所餘殘匪較之目前賊數稍爲增多亦可歸入善後事宜交本省官兵搜捕額爾登保先行奏凱何況此時統計所贖僅有百餘零匪又現有德楞泰在彼可以

接辦經略自不必日久帶兵於外德楞泰身歷戎行亦經八載久著辛勤伊前次入覲時朕本欲授以京職令其暫息勞勩因奏報戴功後或尚有潛伏餘孽地方未就收甯仍任德楞泰成都將軍俾資彈壓是川陝邊界搜捕事宜德楞泰之責較重且此等零星殘匪亦斷無德楞泰不能辦竣之理計額爾登保此摺奏到已逾旬餘而此旨到時又須旬日諒額爾登保已將馬姓等一起賊匪辦竣交代起程儻未勦淨著額爾登保於接奉此旨之日不必遲疑卽帶印起程由五百里於是日覆奏約計何日可以到京並於摺內聲明以慰廑注所有額爾登保未經辦淨賊匪著德楞泰督飭搜緝務期剷絕根株勿留遺孽德楞

泰仍須於川陝邊境各處深山老林逐一排搜俟明歲春融實  
在肅清再回本任其竄入川境之零匪四五十人著交楊遇春  
專辦一律殲除勿稍延緩此時經略雖已凱旋而該處所設防  
守官兵原未概令裁撤德楞泰於額爾登保起身後尤須督率  
鎮將認真籌辦以期迅就廓清至獲賊供稱此起係馬姓趙姓  
王姓三人管事都不知道名字若有問他就要殺害等語看此  
情節甚屬可疑安知非余佐斌苟朝九有名賊目改易馬趙等  
姓恐被人識破故不許同夥詢問德楞泰應倍加留心一經拏  
獲卽當跟究實在姓名毋使兇徒漏網爲要

十二月初五日

諭曰陝省殘匪所贖無幾此時額爾登保回京之後專交德楞素一人辦理德楞素威名素著前後剿辦著名首逆及大小股匪不啻十數萬人況此區區有限殘匪斷無不能辦竣之理但數月以來各處將弁兵丁搜捕事宜似俱不免鬆勁現在已屆臘月設官兵等因年節已近安心度歲以致辦賊稽緩更屬非是軍營積習每屆年節之時卽往往借此休息現雖軍務將蕝究有餘匪未淨更當上緊搜捕爲一勞永逸之計德楞素務當督飭將弁兵勇剋期於年內辦完勿留餘孽切不可任其懈弛上次伊與額爾登保會銜之摺係十一月十五日拜發摺內奏稱零匪竄至涼風埡老林一帶現在督飭田朝貴馬應國等數面

聶逼又平利支河地方零匪逃入川境亦經閻俊烈帶兵趕往等語計彼時發摺之日至今已閱二旬現又殲獲賊匪幾何辦理曾否淨盡著德楞泰卽詳悉具奏

初七日

公奏言查賊匪深匿白筍坪老林山頂該處四面陡絕且在萬山之中冰滑雪厚林密箐深難施兵力田朝貴等連日鼓勵兵勇奮力仰攻該匪倚仗山勢抵死抗拒各路鎮將兵勇卽在雪地露處三面圍逼未能得手該匪於十八日乘雪霧瀰漫於白筍坪無路處老林溜巖向西北之小白沙河潛逸迨午後霧開田朝貴等卽帶兵勇由修溪壩

一路兜截防其北竄馬應國等帶兵由大窩逃趕剿十九日午後追至城口之伍家寨地方該匪正在山梁聚集馬應國等督率兵勇上攻該匪抵死下壓攪殺數次當殲斃頭戴紅頂花翎賊目一名殺賊三名擒獲五名餘匪見兵勇殺斃賊目復敢拚死衝壓馬應國等竭力攻撲始行敗走向轎頂寨普同觀等處遁逃馬應國等仍連夜窮追所有殲斃賊目賊夥首級四顆擒獲賊犯五名一併押解來營臣當卽審訊獲賊據供我們跟隨苟文明在南山裏殺人放火不記次數苟文明被官兵殺了以後大家逃過四川商量總不出老山箐林遇見官兵就捨命抵拒乘空仍

要回陝西南山裏去這個首級是王元帥的那三個是戰手他們原是四箇元帥姓李的已被官兵殺了還有姓馬姓趙的兩箇人管事這翎頂是害了朱大老爺得的等供

臣查該犯五名皆係陳賊當卽盡法處死旋探該匪被剿後漏夜狂奔竄至川陝界連之老林中猴子寨一帶藏匿四面皆係陡壁懸巖祇有羊腸小路東通老鴉口可走南天門西通羊耳壩北由目連壩翻大梁卽通四季河南走普同觀中通空河皆係竄陝之路

臣現令田朝貴等帶兵在空河桂涵羅思舉等在老鴉口馬應國劉健標劉彪等在羊耳壩李應元等帶兵在目連壩扼截又派祝廷彪顧



應全帶兵前赴靈通觀進剿飛飭各鎮將嚴密兜圍不可令其竄越陝省再楊遇春等帶兵在班鳩關劉瑞等在南天門一帶均能認真防堵經略額爾登保接到十一月初五日

諭旨令於封篆前到京當與臣妥商籌定已於十九日自柯家坪

起程由太平定遠西鄉北上封篆前可以到京瞻觀

天顏臣於道旁恭請

聖安畢卽帶兵由城口一帶前進據田朝貴稟報都司龍必達等在道溝老林搜捕殺賊一名生擒一名把總向貴在老君洞老林搜捕殺賊二名生擒四名又拏獲假充教匪殺人

搶奪之賊匪五名一併送交太平審辦等語又據豐紳咨報都司葛天培通判劉星渠在通江地方搜獲零匪一名均經訊明正法又據總兵馬瑜稟報都司史定川前在斑竹園剿散之匪祇贖十四五人竄赴雲陽屬香坪大茅田一帶都司周志林所追前竄團城之二十餘賊今祇有十餘人向青灣子逃遁現均緊跟追剿又接湖北總兵慶溥來信房屬零匪二十餘人昨竄老木孔後知川界邊防嚴密復行折回經遊擊姜元祥追剿殲斃三名生擒一名又被寨勇擒獲一名餘匪折向雲霧溪有副將呢瑪善帶兵追剿又據提督楊遇春咨稱副將閻俊烈跟追遁入川境

之賊該匪現向兩扇門一帶逃遁閭俊烈於十四日由紅  
巖寨前進遏其北竄之路令守備齊慎帶兵勇四百名由  
三合寨偵蹤截擊又據駐防綏定府之臬司劉清副將羅  
思舉來稟探得開屬螞蝗洞水溝等處有零匪十餘人分  
兵剿捕守備王學閻等生擒賊匪四名殺斃二名趙琴生  
擒賊匪五名殺斃一名臣已飛飭該臬司等訊問錄供以  
憑核辦再查南山竄出餘匪據此次獲犯供稱有曾充鄉  
勇之人在內此輩數載以來皆隨同官兵殺賊效力著有  
微勞計戡定後三省裁撤不下二萬餘衆均皆循分歸業  
各謀生計今此百餘人忽流而爲匪其中或另有他故亦

未可定若不分皂白概予誅戮似非所以仰體我

皇上好生大德

臣

現繕簡明諭帖剴切曉示以爾等附和賊黨必

有他故或原帶官員素日剋扣或遣散時該地方官短發  
賞項俱准其來營訴明申理屈抑如執迷不悟則必概予  
誅戮已分派能事鄉勇分投曉諭臣仍一面督催鎮將上  
緊追剿並嚴飭陝省弁兵加意堵禦勿任鬆勁

諭曰川境竄匪前據德楞泰等奏稱分路兜圍設伏截擊自應迅  
速掃除今據奏該匪等深匿白筍坪於十六十七兩日雨雪交  
加陰霧甚大官兵未能得手該匪於十八日乘雪霧瀰漫溜巖  
潛逸午後霧開田朝貴帶兵勇兜截馬應國帶兵趕剿等語近

日各路鎮將大率因餘匪無多均不免意存鬆懈看來此次竄匪必係田朝貴等圍堵不嚴致令逸出是以該鎮將惟恐獲咎卽行帶兵兜截情節顯然何以德楞泰並不據實參奏從前剿辦數年每遇冬令賊匪卽竄匿山林間開春以後又任四出滋擾今肅清久報零匪祇此二百餘人若不嚴行督催示以懲創必至又如前數年散而復聚成何事體著德楞泰卽將此次餘匪竄走係何人帶兵圍捕處所逸出查明參奏卽責成該員速將此起竄匪剋期辦盡如能依限掃蕩尙可將功折罪設再有遲逾卽當嚴行治罪現據奏稱該匪等竄至川陝交界之老林中猴子嶺一帶四面皆陡壁懸巖祇有羊腸小路東西南三面

可通陝西已派令田朝貴等分投圍剿似已嚴密德楞泰當嚴飭各鎮將亟當乘此擊剿淨盡如再稍有疎縱致該匪復行竄出則惟該鎮將是問此時該省防剿兵勇不下三萬剿贖黠賊若不迅速剷除或致別有勾結辦理更形棘手現在額爾登保業已起身還朝惟德楞泰一人統領師旅務須督率官兵仍前奮勉各行上緊搜捕期於歲內務臻完善果能如期奏報尙當予以恩施設辦理稍有稽緩年內不能捕盡或至來春仍有出沒奔竄勢必須派額爾登保重來督剿卽額爾登保在京聞知零匪未完亦必懇請前往彼時德楞泰尙有何顏對朕耶不可不勉之又勉也再據奏此次獲犯供稱卽有乘空要回陝西南

山之語恐該匪等被勦情急又圖竄入南山更形費力德楞泰當飭知各路營卡嚴行防範務使就地殲除毋令竄至陝省或闌入楚境爲要其楊遇春一路零匪亦著飭催辦竣又據奏此起零匪內有曾充鄉勇之人德楞泰以此輩皆著有微勞未便卽予駢誅其中或另有他故現已繕發告示諭令來營訴明情節此等散遣鄉勇從前隨營打仗出力自屬良民今業已從賊抗拒官兵卽爲叛逆罪應誅戮不得因其前有微勞遂從寬宥卽查州縣等果有剋扣等弊祇當一面將地方官參辦亦不能末減該鄉勇等叛逆罪名總之實在悔罪投出誠心乞命者卽真正匪黨如張長青等猶准貸其一死況曾充鄉勇之人自應

量予恩賞但德楞泰不可有先存招撫之見稍事姑息惟竭力殲除以淨根株至現在留營各鄉勇與從賊之鄉勇素皆相識亦不免潛通信息此時額爾登保旋京及官兵舉動保無賊匪中先已知覺尤關緊要德楞泰當通飭帶兵各員嚴密訪查總以速行剿竣斬盡葛藤方爲正辦

同日公又奏言竊<sub>臣</sub>等奏報蕨功將近一載今南山竄匪尙未悉數殄除每念及此五內焦急而現在豫省河工重大蠲賑頻陳竊窺

聖心未免益滋宵旰伏查目下三省餘孽無多惟此二百餘人在川陝邊界倚恃老林不過苟延殘喘計算三省征防官兵



御批通志卷之二十二  
不下三萬實數剿辦再查前次奏報戡定時摺內聲明恐  
三省邊界山大林深一時不能搜淨所餘零賊均歸本省  
地方官作爲土匪搜捕此股殘匪儘可照依原奏章程辦  
理臣雖係成都將軍而三省賊情斷不敢稍分畛域如能  
在川就地辦完固爲妥善萬一竄越陝楚臣亦當親督大  
兵緊躡跟追以冀迅就肅清不致再有滋蔓伏願

聖懷稍寬西顧臣受

恩至深極重惟有督率鎮將等竭盡血誠不遺餘力以抒犬馬戀  
主之心

硃批覽奏具見誠悃可嘉之至但川陝餘孽不靖何能解朕之憂

勉力速辦務於年內竣事

十六日

公奏言前月二十五日大雪迷漫猴子寨四面陡壁羊腸細道壅閉無蹤各鎮將等正在設法探路仰攻詎該逆於二十六日晚三更時潛由熊坪溜巖偷竄北走目連埡當被遊擊馬成林營卡知覺槍礮轟擊奮力截殺該逆倚仗自高臨下抵死衝突馬成林等復督率步兵用長矛擊刺與賊攪殺數次當經戮斃四人生擒三名將該逆衝爲兩截一半折轉硝洞灣後山老林一半由水廠溝竄進老林中之茵扒一帶當將活賊解赴大營

臣

聞信恐馬成林兵

力稍單飛飭田朝貴桂涵羅思舉等帶兵赴目連埡稍北要路截剿折竄硝洞灣之賊該逆復乘夜偷越與菌扒老林之賊合夥同鑽入梓木坪藏匿該處地勢險峻四面皆通陝界臣飛飭總兵劉瑞在滄水河加意防堵並派參將劉健標祝廷彪帶兵勇千餘名前往協同截擊旋據副將馬應國等稟稱於二十九日探蹤追至廟溝見該逆已上刀背梁趕上賊尾射傷賊匪數名生擒三名因時已昏黑卽在廟溝暫紮活賊均解赴大營旋據總兵劉瑞稟報三十日夜三更時賊匪一二百人乘雪霧迷漫至滄水河欲撲營卡當經施放槍礮斃賊四名賊始潰散劉瑞復帶兵

追襲該逆仍退回界嶺半山藥扒老林不敢北竄其勢東趨亢河等處等語臣已飛飭劉瑞劉健標等緊顧東北截剿斷不可令其北竄江邊亦不可令其東奔楚境臣於各處獲賊解到後訊據僉供實在陳賊不過三四十人其餘大半皆是當過鄉勇之人等語將該逆等均卽正法隨飛飭馬應國等毋庸尾追卽由南天門取道過陝會同劉瑞劉健標等分投截剿又飛行照會楊遇春將各卡兵力歸集緊顧北路江岸迎剿去訖又據副將閻俊烈稟稱追剿川陝邊界殘匪在川境大埡山遇賊接仗因山勢陡峻未能得手該匪繞道直奔陝境八仙河閻俊烈卽趕赴燕子

河將賊攔回大埡山該逆復從小埡山奔竄閻俊烈帶兵窮追該逆已逃入紅巖寨一帶閻俊烈現由光頭山老林追剿並據該副將差來兵丁稟稱此股賊匪共有六七十人內中老賊不過一二十名其餘皆係鄉勇及各營落後夫役等語臣隨嚴飭該副將上緊搜追以期迅速肅事又據湖北總兵慶溥來稟房境殘孽二三十人經遊擊姜元祥等追至龍門垭一帶殲斃賊匪四名餘匪由豐溪潛入陝境姜元祥等現在緊躡跟搜喜明亦派兵協剿等語臣亦卽飛飭該鎮等刻日掃除不可稍涉觀望再據總兵馬瑜稟稱都司史定川一路外委王雄英等在夔府鳳仙觀

八道河一帶先後擒獲賊匪八名又兵丁李萬有在老木  
孔盤獲賊匪一名均訊明分別辦理又據臬司劉清等稟  
報都司趙琴在開縣搜獲賊匪三名亦經訊明核辦惟南  
山零逆一二百人田朝貴一路官兵輾轉窮追總未辦竣  
臣恐其中或有掣肘之處是以臣於二十九日趕至空  
河田朝貴營內該營前敵兵勇俱向臣痛哭訴苦臣查看  
該兵勇尙是夏季單衣不能禦寒且大半跣足詢知各營  
原製有冬衣軍裝運送前來實因入冬雨雪連縣老林路  
遠無從趕及卽糧米亦不能時至臣見此情形深爲憫惻  
當卽趕緊將賞需項下製造棉襖三百件布鞋五百雙中

衣二百條擇其實在單寒兵勇略爲分給其馬瑜一隊官兵本在川東邊界茲因聞閭俊烈所追之賊折竄陝界馬瑜亦探勦前來臣察看此隊兵丁冬衣尙無短缺至鄉勇棉襖則係該鎮等自行捐備齊整臣思田朝貴一路兵勇必須稍爲整頓方能勦賊且現在南山零逆已入陝境田朝貴向來總在川省勦賊從未出疆陝楚兩省道路情形皆非熟諳其所帶官兵鄉勇居多今此股賊匪內大半卽係鄉勇恐臨陣稍有觀望於事無益馬瑜本係臣營務翼長素得軍心數年以來往來三省於陝楚情形皆能熟悉其所帶本係陳兵可以得力自應酌量改撥臣現卽督率

馬瑜及副將馬元張應貴馬應國等赴陝追剿其田朝貴  
原帶兵勇二千餘名臣酌量抽帶數百名其餘均令馳回  
川東搜捕並飛催各營軍裝迅速解往應用其閻俊烈所  
追之賊現在川陝交界紅巖寨地方游弈已就近札飭桂  
涵羅思舉帶兵向兩扇門取道迎擊並令田朝貴順道探  
剿至臣現在督兵過陝已飛行知會楊遇春從班鳩關帶  
兵自北面緊顧江岸迎剿並札飭王兆夢自八仙河探蹤  
前來總不使該逆竄入南山致辦理又形棘手再額爾登  
保起程時曾將

欽頒賞項內撥銀三千兩留備獎賞兵勇之需合併聲明



諭曰上年大功將次告成朕卽慮鄉勇一項於裁撤後或復行滋事再三諄諭各督撫妥爲安插今賊夥內陳賊祇三四十人其餘皆係鄉勇可見該地方官於安插一事竟屬陽奉陰違未嘗認真經理該鄉勇等本有身家者散遣歸農原可各安生理其無業之徒卽官爲賞給到手隨卽花費迨餬口無資勢必復思搶掠況不肖官吏或將伊等應領之項從中侵扣私肥已橐亦屬事之所有是鄉勇等流而爲匪皆由地方官不能妥爲安插所致茲伊等旣已從賊卽當與賊一律剿辦惟各路鄉勇尙未盡撤德楞泰於帶兵搜捕時不可將賊中半係鄉勇遽爲宣露以致隨征鄉勇轉生疑懼其有自賊中棄械來投者詢明果係

賊夥轉不妨卽行開釋予以安插如詢係會充鄉勇之人卽告以爾等會隨官兵剿賊今轉去而從賊知法犯法罪在不赦本應立正典刑因皇上念爾等從前隨營或臨陣打仗或分卡防堵著有微勞特於法無可貸之中寬其一死於詢明後卽行發遣不可姑息容留內地並當向其追問係何處鄉勇地方官曾否安插及因何從賊緣由徹底根究如查有剋扣資給銀兩等弊德楞泰務卽會同勒保從嚴參辦卽此項餘匪刻日肅清亦應徹底查究不可因軍務完竣稍有姑息至摺內稱德楞泰於前月二十九日趕至空河田朝貴營內該營前敵兵勇俱向痛哭訴苦查看該兵勇尙是夏季單衣不能禦寒且大半跣足等

語披閱之下朕心深爲憫惻各營冬衣軍裝等項原應源源運供庶搜捕不致掣肘乃田朝貴帶領兵勇三千餘名際此冰雪嚴凝之候半係跣足單衫試思官兵衣履尙不能禦寒如何責令追剿賊匪無怪乎田朝貴現領多兵辦此百十殘匪日久總未掃滅其運送遲誤之員必須查明參辦田朝貴係帶兵大員旣日擊部下兵丁寒苦情形亦應早行稟知經略參贊妥爲籌辦何以直待德楞泰前赴該營查看始據兵丁等當面訴告乎著德楞泰會同勒保卽將此一路承辦軍需之員查明嚴參並將田朝貴不及早稟知之處一併參奏至此項兵丁如此辛苦並無逃亡等事尙知大義深堪嘉獎除德楞泰業於賞需銀內

製造棉襖中衣布鞋等件分給兵勇外著再於賞項內添備衣履普賞該營以示體卹其馬瑜一路兵勇棉衣據稱該鎮俱捐辦齊整既係自行捐備恐該營軍裝亦必尙有未敷並著酌加賞給仍查明辦理此一路軍需之員如有貽誤一併參奏再據德楞泰稱田朝貴一路兵丁並未到過陝楚是此項供支總係四川局員承應勒保身任總督於遣散鄉勇既未能飭屬留心妥爲安頓復致流而爲匪其資送軍裝支給糧餉又不能隨時運供源源接濟以致兵丁衣履不全禦寒無具而勒保尙毫無聞見所需兵餉祇知東移西借並不能實力籌辦又不將餉項不敷情形早行奏請撥給看來勒保因大功告成餘匪無多遂

未免心存懈弛勒保著傳旨嚴行申飭現在賊匪竄至陝界之  
亢河一帶德楞泰已札知楊遇春王兆夢等兩面迎剿務須上  
緊趕辦就地殲除斷不可再任賊匪竄入南山或闖入楚省以  
致辦理又形費手如能於年內廓清地方早臻甯謐卽由五百  
里馳奏德楞泰等尙可仰邀懋賞勉之望之

二十六日

公奏言臣於初四日移營督同馬瑜等翻南天門入陝途  
次據總兵劉瑞稟報該匪於初六日已向曹家壩奔竄劉  
瑞帶兵前往兵抵曹家壩該匪先已搶占後山老林憑高  
下壓官兵鼓勇搶上將賊逼上山頂斃賊二名守備齊慎

射死頭戴翎頂賊目一名該匪竄入黑溝老林乘夜由雞  
公寨奔瓦脊溝毛溝擾至孟石嶺旋據總兵王兆夢參將  
劉健標祝廷彪等稟報該鎮等駐紮支河口殺賊二名該  
逆旋由孟石嶺後面金家山壓下將該處坐卡汛兵衝散  
殺害四名放火焚燒衙署兵房各四間仍竄入毛家溝各  
等情臣一面飛飭王兆夢劉瑞等緊顧東北堵剿一面督  
兵趲行初十日趕抵平利屬之格草河探得該逆屯於老  
林內橫山大梁半山之梁家灣相距祇有五六十里是日  
風雪交作於三更後冒險進攻派總兵馬瑜帶同副將張  
應貴吳廷剛遊擊劉彪張紹緒都司彭家棟高星文瞿心

能史定川守備謝金章等由八義寨油房溝獐麕巖而進  
臣親督副將馬元馬應國參將哈豐阿遊擊劉廷斌都司  
江萬里何化龍守備張萬林等由兩河口雙合寨茅坡前  
進四山雪光照耀恍同白日五更時齊抵橫山大梁遂各  
步行前進當有賊匪數十人挺矛撲出我兵一見齊力衝  
殺斃賊十餘名生擒二名賊衆沿途吶喊至獐子坪忽又  
有賊百餘人突出其後又復吶喊前賊遂折回反撲馬元  
張應貴馬應國彭家棟高星文史定川謝金章張萬林等  
見賊勢兇悍心懷忿憾各脫皮袍提刀帶兵衝入賊隊攪  
殺一處馬元張應貴馬應國等手刃賊十餘名忽被旁賊

衝出張應貴彭家棟均被矛傷陣亡弁兵鄉勇內亦有傷

亡者十餘名賊匪奔上陡巖追臣督兵繼至巖上飛石如

雨屢攻不上相持至晚兵勇疲乏勢難再進當將擒獲各

犯訊明供詞卽行正法賊匪現由清水河竄上大茅坡屯

於東多羅河查東多羅河左通白土關右走香河中路可

通太平河八角廟均係三省連界之區王兆夢劉瑞現帶

兵勇二千餘名又楊遇春撥添河州兵一千餘名共有兵

勇三千餘名喜明現有兵勇八百餘名已均令其緊顧東

北堵剿該逆不能竄越臣督同馬瑜緊躡跟追諒亦易於

集事至各處搜捕零匪近據豐紳咨報遊擊畢萬年在杜



家坪老林內搜獲賊匪二名遊擊蕭太和都司沈文同等在景家溝地方搜獲零匪二名又據臬司劉清等稟報遊擊張拱辰在草廟子搜獲零匪一名又據甯陝鎮總兵楊芳稟報委員應先杰等率同官兵寨勇在東腰竹溝林內殲斃賊匪二名又據總兵喜明稟報遊擊楊得陞會同楚境界嶺營卡守備楊儒在水全一帶擒獲賊匪一名殺斃一名所有活賊均經訊明辦理再據總兵喜明報稱閻俊烈桂涵羅思舉等所追零匪六七十名已至川陝交界之竹橋河閻俊烈等緊躡追剿田朝貴因川東無賊亦帶兵前來協剿於十二日抵老鴉鋪喜明又派遊擊璩嘉驥帶

兵三百名前往協剿再湖北遊擊姜元祥追剿零匪二三十名現已竄至陝西界上之楊道士溝喜明派把總馬斌帶兵百餘名前往迎剿臣恐其兵力稍單又飛飭王兆夢一路挑派都守一員帶兵二三百名前往現在三省賊情惟陝西稍重而楊遇春現又傷發不能帶兵臣應暫在陝界督同各路鎮將趕剿將此三股零匪辦竣肅清陝境公又密奏言臣前訊據獲犯供詞及差兵稟稱賊夥內有大半當過鄉勇之人恐有受屈激變之事遂繕簡明諭帖令隨征鄉勇持往曉諭乃此次臣督兵在橫山大梁乘夜襲剿我兵正當得手之際臣在山梁策應瞥見前敵旗幟

不動其時總兵馬瑜副將馬元張應貴馬應國都司彭家棟高星文史定川守備謝金章等卽解去撒袋脫下皮袍持腰刀督率官兵首先衝入賊隊賊退踞巖礮副將張應貴等復衝上巖口力戰而前隊鄉勇並未接續前進遂致張應貴彭家棟受傷陣亡弁兵同時陣亡者有二十餘名馬瑜等帶兵前進力難攻取查臣一路現帶鄉勇共七百餘名內有由苗疆而來者亦有二三年間充當者素極奮勇此次何袖手不動實堪詫異隨卽嚴查係前敵陣陣得勝旗如意旗花蜈蚣旗三營之鄉勇旋據三旗千把軍功首領等率領各隊鄉勇來營跪稟我們受

皇上的天恩侯爺的教訓今日原要拚命打仗不想接仗時看見多是各路同當過鄉勇結拜的弟兄以及朋友親戚並不是賊他們說是受了冤屈祇要報讐大家就散並不敢與官兵打仗聽了他們這話不覺心酸手軟他們原喊說德侯爺的恩典很重衆人不要動手那張大老爺彭總爺們帶兵緊催殺了他們幾箇人賊纔動手傷害的祇求侯爺施恩小的們情願進去叫出他們來查明被屈根由求侯爺替他伸冤就可保全我們鄉勇臉面苦他們不從我們三營的鄉勇總要把他們殺箇淨盡祇求賞發諭帖前去等語長跪叩求痛哭不起

臣

查鄉勇等觀望不前萬分可

惡卽當盡按軍法嚴辦但思人數過多法難及衆如過嚴峻又恐激成事端況現據獲犯供稱此起二百六七十人內陳賊實祇三三十人其餘多是各營鄉勇又查三省鄉勇裁撤者不下三四十萬卽戡定以後裁撤者亦有三四萬其中無賴不少而現在臣一路尙有七百多名此外各營鄉勇約計不下四五千人恐衆人疑而生變實於軍務有礙再該逆所稱冤枉之處臣前此亦有聽聞並未得其確切如果受屈情眞則是激變釀事尙非從逆可比自當招令前來伸訴雪其沈寃免致勾結煽惑各路軍心亦可釋然鎮定是以臣當卽剴切曉諭念爾等隨征出力多年

如一概駢誅於心不忍姑准爾等所請隨詳繕諭帖令將  
所稱冤枉之處指出代爲究辦該三營鄉勇藍翎千總魏  
忠才等當領諭帖歡欣而去伏查三省遣撤鄉勇一節自  
五六年以來屢蒙

皇上籌及幾先

諄諄告誡無微不至

睿算深遠果不出

聖明洞鑒之中

臣

實深感服之至此次

臣

不敢逞一時之忿致礙

大事祇得將計就計該逆如果負屈情真撫之固宜如或  
假捏不從或將魏忠才等戕害則必結冤於衆使已撤未

撤各鄉勇心口了然彼時再爲盡絕根株自無他怨此時  
無論勦撫均係臣專責唯期設法籌辦不致稍有僨事冀  
以仰副

委任

同日公又奏言查楊遇春因冒雪追賊墜馬傷重不能帶  
兵應令其回籍調養守制但陝省不但零匪未淨卽應留  
聽撤官兵尙有萬餘名雖經額爾登保辦定章程實不可  
無大員統領楊遇春亦斷不肯因微傷卽思息肩是以臣  
仍令其在班鳩關安心調養督飭各路鎮將搜捕零匪堵  
剿北面又臣本標中軍副將馬應國稟報現丁父憂例應

回籍守制查馬應國自苗疆隨臣一路帶兵打仗最爲得力此時賊情狡猾正須出力可靠大員應請

旨飭令馬應國暫留軍營帶兵俟此股零匪完竣再令回籍終制諭曰此次德楞泰分派官兵於平利地方共計殲擒數十名其餘敗殘之賊無幾諒不難剋日殄除惟另摺密奏在平利帶兵時前敵鄉勇見賊袖手不動並來營代訴從賊鄉勇受屈情由求發諭帖前往招撫等語此事殊關緊要自勦辦教匪以來朕早慮及蕲功後安插鄉勇殊不易易節次降旨令各督撫妥爲辦理今零匪三百餘人內鄉勇居其大半而隨征之鄉勇又復互相觀望漸成尾大不掉之勢實爲可惡伊等來營申訴之語不



過爲夥黨飾詞緩死全不足信卽如該勇等旣稱賊中鄉勇喊說德侯爺恩典很重不要動手旣如此何不赴營陳訴何以又敢將副將都司大員戕害其所稱受屈報讐之語究竟所屈何事欲報何讐毫無指據此等不逞之徒膽敢戕害帶兵大員其罪固在不赦卽隨征鄉勇觀望不前有心挾制官兵若按照軍法亦當一體懲治德楞泰以各路軍營鄉勇尙有未盡裁撤者恐其激而生變現已發給諭帖卽令情願前往賊中之鄉勇藍翎魏忠才等持去祇係暫時權宜辦法魏忠才去後逆匪等竟將伊等殺害不肯投首則其悖逆顯然正可激勵各鄉勇以伊等全不顧弟兄親友情誼甘心叛逆爾等均係爲國出力義勇

亟宜殲此餘孽渥受恩賞儻竟受撫來營亦不能概行寬釋其中戕害副將都司者必須令其據實指出明正典刑此外兇悍助惡者均當發遣其餘或暫爲羈縻但終係反側之徒全不可信卽現在隨征鄉勇在前敵者不但互相觀望甚至與逆匪彼此交言且公然向軍營申訴其驚驚不馴已可概見此項鄉勇合計尙有四五千人卽剿捕完竣後散遣亦頗不易此內如有願回鄉里自謀衣食者固屬甚善儻不願散歸若勉強從事勒令遣回伊等仍恐聚集爲患此事專交德楞泰籌畫萬全不可激變釀事亦不可姑息養奸如不能散遣應如何設法安置鈴束勿令滋生事端詳悉妥議具奏再摺內稱該逆冤枉之處前

御片長公金言卷二十一  
此亦有聽聞一節德楞泰既有所聞自應迅卽訪查確切奏聞  
究辦何以屢次奏章竟無一字提及著卽詳細根究如實係地  
方文武有剋扣凌虐情弊自當加以懲創但此時不可輕長刁  
風統於事後再將該員等嚴行參辦可也又據奏楊遇春因傷  
不能帶兵請令在班鳩關安心調養藉以堵剿北面自應如此  
辦理其丁憂之副將馬應國著照所請照例開缺暫留軍營搜  
捕俟零匪辦竣再令回籍所有陣亡之副將張應貴都司彭家  
棟著咨部加一等賜卹陣亡兵勇並著咨部照例卹賞

二十七日

諭曰本日召見額爾登保朕面加詢問據稱伊前在軍營時卽聞

鄉勇等因散遣時得項較少未遂所欲或窮而無歸不免心生  
缺望此外實別無抱屈之事至逆匪等臨陣揚言或希圖緩我  
官兵進剿得以占地設伏遂其詭計或藉以搖惑從征鄉勇之  
心總之該匪等既經從逆膽敢戕害帶兵大員自當嚴行懲辦  
不可稍存姑息致長刁風等語該鄉勇等若果祇因得項較少  
心懷屈抑則尙屬易辦德楞泰現已遣令魏忠才持諭開導如  
該匪等不肯投首或將魏忠才等殺害則叛逆顯然正可激勸  
留營鄉勇共矢同讐盡殲餘孽儻竟受撫來營亦不能概從寬  
宥務將此次戕害副將都司各逆首諭令據實指出明正典刑  
試思尋常殺人案犯律當問擬抵償況臨陣戕害大員尤罪在

不赦乎此外兇悍助惡者亦應查出數人發遣其餘歸入現在  
隨征鄉勇內妥爲散遣現據額爾登保奏稱德楞泰所帶鄉勇  
約九百餘人此外楊遇春帶領者約一千數百人川楚兩省亦  
尙有一千七八百人均係分撥巡防有鄉勇之處卽有官兵兵  
數皆多於勇並稱鄉勇中情願入伍者不少此等留管鄉勇均  
與逆匪等素相熟識若目下遽行散遣恐被勾結入夥自當暫  
緩裁撤統俟事竣後擇其情願入伍者分發各標營當差其餘  
不願入伍之人酌量優給行貲俾歸鄉里著德楞泰查照妥辦  
至此次在橫山大梁前敵鄉勇觀望不前甚至與逆匪交談代  
爲申訴心懷挾制殊屬不法事定後亦當查明數人照軍法從

事俾知儆畏再現留軍營官兵據額爾登保爾均極得力德楞  
泰帶兵剿辦時何不派令官兵向前敵衝鋒而以從征之鄉勇  
派在後隊策應庶不致臨陣觀望有誤軍機現在川陝邊境祇  
此零孽二百餘人德楞泰素能奮勇務當速行殲淨毋再延緩  
今已屆年節轉瞬春融該將軍總應剋期趨辦詳悉妥籌以靖  
地方而弭後患爲要